



Organisacion di
Pensionado Publico di Aruba

OPPA: Organisacion di Pensionado Publico di Aruba

Interes material pensioen

DEN e articulo aki OPPA ta amplia riba pensioen y poder di compra cu ta dirigi e bida diario di un pensionado. Su entrada mensual ta haci posibel p'e por cumpli cu su debenan financiero, su gastonan mensual, su salud, su recreacion y su independencia.

Pensioen

Stichting Algemeen Pensioenfonds Aruba (APFA) t'e fondo di pensioen p'e ex- empleadonan publico. E suma cu un pensionado publico ta ricibi ta depende di cuanto aña el a traha y contribui den e fondo y su salario. Despues di cambio di e ley di pensioen na 2011 e pensionado ta ricibi un suma mediano (middelloon) en bes di e 70% di e ultimo salario ricibi.

Banda di e pensioen aki APFA ta facilita pago di e "*bashi premie*" den luna di januari y e "*gelijkbedrag*" den december n'e pensionado publico. E placa aki ta un compromiso di gobierno pa perdida di poder di compra den añanan atras.

E compromiso aki a keda limita na un periodo di 10 aña, di 2014 te 2024. Tambe e compromiso a exclui tur pensionado publico cu a baha cu pensioen entrante januari 2015. P'e empleado publico mientras tanto a renoba e compromiso aki y nan lo sigui ricibi nan "*bashi premie*", "*reparatietoeslag*" y "*gelijkbedrag*" entrante 2025. Straño ta cu e empleado publico cu recien a cuminsa traha ya ta haya e placa aki mientras no por papia ainda di perdida di poder di compra.

P'e pensionado publico e gobierno actual no a menciona un otro areglo. Tampoco gobierno a sinta na mesa cu OPPA pa papia riba prolongacion di e areglo aki. Pues nos mester conclui cu otro luna e compromiso aki ta yega su fin. OPPA desde 2017 a cuminsa puntra gobierno atencion p'e areglo aki, pero lamentablemente nunca gobierno a honra nos peticion cu un reunion. Aki por agrega cu mayoria di e cartanan cu a bay p'e gobernacion actual a keda sin haya un reaccion.

Si pasa den e programanan di gobernacion di e partidonan politico, OPPA no a topa ningun mencion di e "*gelijkbedrag*" y "*bashie premie*" p'e pensionado publico.

Esaki kiermen cu e topico aki no tin prioridad pa ningun partido politico.

OPPA su miembronan tambe ta ricibi pensioen di biehes (AOV)

di Sociale Verzekeringsbank (SVb). Depende di cuanto aña e persona a biba na Aruba, segun un formula, e ta ricibi un pensioen cu ta **Afl. 1265,-** maximo pa luna y pa un pareha casa **Afl. 2130,-**. Den december tur pensionado ta ricibi e "*kerstbonus*" cu ta 75% di e suma di pensioen den e luna di september. Tambe e pensionado ta ricibi un "*reparatietoeslag*" di Afl. **230,-** pa luna, cu ta un compensacion di gobierno. Y na final di su bida, famia directo di e pensionado por haci peticion pa haya un contribucion p'e gastonan di entiero. E suma cu ta haya ta 3 luna di e pensioen cu e pensionado tabata haya.

Hopi hende lo pensa cu e pensionado publico tin'e hopi bon y no mester keha.

E pensamiento aki ta comprendibel, pero no ta cuadra cu berdad. Bou di e miembronan di OPPA tin en berdad pensionadonan cu tin un bon entrada. Pero tin tambe esnan cu no ta ricibi pensioen di APFA, pero ta ricibi un "*uitkering bij wijze van pensioen*". E pensioen aki cu ta un sosten financiero di gobierno pa motibo cu e personanan aki nunca a pidi pa nan servicio su derecho di pensioen y no a contribui nunca cu e fondo di pensioen. E suma cu e personanan aki ta ricibi ta hopi abou.

Echo ta cu mester mira e entrada di pensioen den relacion cu e costo di bida y e poder di compra. Costo di bida ta hopi halto na Aruba: practicamente tur cos mester keda importa for di exterior y e comerciante ta compensa su gastonan den prijsnan cu e ta cobra pa su productonan. Banda di e costo halto di productonan e pensionado mester paga pa AZV y su remedinan. Y si prijsnan sigui subi, e pregunta ta si e pensionado ta haya suficiente entrada p'e cumpra lo esencial, su poder di compra ta keda afecta y lo pone scoge kico e ta cumpra y ki debe e ta paga.

En conexion cu e eleccion binidero OPPA lo tira bista riba e programa di gobernacion di e diferente partidonan politico, pa sa nan posicion pa cu e situacion di e pensionadonan. Kico nan ta pensa di e situacion actual, ki cambio of solucion nan kier bin cu n'e y con nan ta pensa di logra esey? Con realistico e prioridadnan ta? Y di berdad esaki ta encera un cambio pa miho p'e pensionado?

Den e siguiente articulo nos lo enfoca riba e topico di pensioen y nos lo duna nos comentario riba e ponencianan di e diferente partidonan.